

# Qalam

Bilangan 111 Rabiul Akhir 1379 Oktober 1959 60 sen

## Jagalah Hak-Hak Bersama

Tun Abdul Razak bin Hussein, Timbalan Perdana

Menteri Persekutuan dalam ucapannya di Kuala Muda dikatakan berkata bahawa PAS tidak mempunyai perdirian dengan kerana PAS bersedia memberi kerjasama dengan Perikatan dalam perkara-perkara yang membawa kebaikan kepada maslahat orang-orang Melayu umumnya, seperti yang diucapkan oleh Dr. Burhanudin dalam Persidangan Pembukaan *Parliament* baru-baru ini.

Peribadi Tun Abdul Razak, di dalam beberapa masa yang lampau ini adalah dipandang tinggi oleh orang-orang Melayu. Sepanjang-panjang masa yang lalu, kita belum pernah mendengar beliau mengatakan perkara-perkara yang menyakiti perasaan umat Islam seperti yang pernah diucapkan oleh Tengku Abdul Rahman. Pandangan ini lebih-lebih lagi dihargakan orang dalam masa beliau menghadapi krisis Perikatan yang dilakukan oleh puak-puak yang tidak puas hati dalam M.C.A. tempoh hari.

Ucapan-ucapan beliau di dalam pilihanraya, rasanya tidak pernah kita mendengar yang beliau ada mencabar dasar-dasar Islam dan orang-orang berpendapat bahawa beliau lebih banyak mempertahankan dan memperjuangkan hak-hak keutamaan orang-orang Melayu.

Sebab itu baik lawan atau kawan sedikit sebanyaknya adalah meghormati dan menghargakan perdirian beliau. Kerana penghargaan yang demikian itulah kita menulis di sini dengan tujuan menjaga kebersihan diri beliau supaya beliau jangan termasuk ke dalam golongan-golongan yang banyak menggunakan sentimen di dalam perjuangannya untuk kebijakan am.

Sebagai puak pembangkang yang sihat, PAS telah menunjukkan coraknya bersedia memberi kerjasama kepada

kerajaan Perikatan di dalam perkara-perkara yang membawa kepada kebijakan bangsa Melayu khususnya. Tawaran seperti ini, walaupun datangnya dari pihak lawan, dengan sifat Tun Abdul Razak seorang Melayu, kalau tidak pun mau menerima orang itu semolek-moleknya, menurut pandangan kita, diam ada lebih baik sebab perbuatan menolak tawaran yang berfaedah kepada bangsa Melayu, sudah barang tentu harus akan menimbulkan persangkaan-persangkaan yang tidak baik di kalangan orang-orang Melayu kerana walau bagaimanapun perkara-perkara yang membawa kebaikan untuk orang-orang Melayu, yang mundur di dalam serba-serbinya berhajat diperjuangkan bersama-sama oleh seluruh umat Melayu. Sebaliknya, kata-kata penolakan Tun Abdul Razak itu ditakuti pula kelak akan menimbulkan sangka-sangka bahawa orang yang diharap memperjuangkan cita-cita dan maslahat orang Melayu telah pun lebih mengutamakan kepada maslahat-maslahat lain.

Di dalam masa sekarang kita berharap benar, langkah-langkah Tun Abdul Razak mustahak benar berhati-hati supaya orang-orang yang di luar daripada parti-parti ada menaruh harapan yang penuh kepada beliau. Beliau diharap menjadi orang yang jauh pandangan dan halus di dalam langkah-langkahnya di dalam memperjuangkan cita-cita untuk maslahat bangsa Melayu. Beliau hendaklah memerhati suara-suara dari Singapura yang memandang bahawa perjuangan bangsa Melayu ialah perjuangan perkauman – dan kerana itu apa yang yang ditakuti oleh pemimpin-pemimpin Melayu dahulu itu akan sampai saatnya di dalam masa kesiapan orang-orang Melayu di dalam politik dan ekonomi boleh dikatakan belum ada sedikit jawapan. Belum ada persiapan-persiapan seperti itu untuk Persekutuan Tanah Melayu, ertinya orang-orang Melayu di Persekutuan nanti akan berada seperti orang-orang Melayu di Singapura. Semoga bahaya kepada keselamatan orang-orang Melayu diperhatikan oleh beliau (Tun Abdul Razak) dengan saksama dan diharap benar beliau akan mengorak langkah-langkah yang halus dan tidak menimbulkan sesuatu perasaan kepada am yang mengurangkan pandangan baik orang selama ini kepada beliau.

## Islam Tak Dapat Dipisahkan

### Dari Masyarakat

Perdana Menteri Singapura, Tuan Lee Kuan Yew dalam ucapannya di Majlis Jamuan Teh *Mawlid Nabawi* yang

diadakan oleh orang-orang Islam Singapura, di antara lain mengatakan bahawa orang-orang yang beragama hendaklah sabar dan janganlah mencampurkan siasah dengan agama dengan menggunakan agama menaikkan perasaan siasah.

Perkataan Perdana Menteri Singapura ini, sebenarnya menunjukkan bahawa beliau tak mengerti dan tak mengkaji kedudukan agama Islam dan perdampingannya dengan siasah bernegara. Hal yang demikian ini, kerana beliau bukan seorang Islam dan bukan pula orang yang mendalamai hal-hal Islam dan sejarahnya, bolehlah dimaafkan tetapi sebaliknya sepatutnya beliau sebelum bercakap dihadapan am hendaklah menyelidiki dahulu kerana ditakuti bahawa dengan berkata-kata di dalam suatu perkara yang kita percaya hanya pendapat daripada “mendengar” sahaja akibatnya akan kurang baik kerana harus tujuan yang bersih daripadanya akan dipandang orang dengan perbuatan cuba menahan kebebasan pendapat sesuatu agama.

Tuan Lee Kuan Yew harus tidak mengetahui bahawa agama Islam adalah keadaanya lain daripada agama lain. Ia tidak dapat dipisahkan dengan siasah disebabkan Islam mempunyai empat punca-punca hukumnya:

1. *Ibādah*
2. *Munākahāt* (nikah kahwin)
3. *Mu‘āmalāt* (berjual-beli)
4. *Jināyāt* (hukum-hukum jenayah)

Untuk menegakkan hukum-hukum ini maka diwajibkan bagi tiap-tiap pemeluknya menghukum dengannya dan jika ia tidak menghukum dengannya maka orang-orang itu akan jadi fasik, zalim dan kafir. Kewajipan ini adalah terus-menerus diwajibkan tetapi jika sekiranya mereka tidak dapat melaksanakannya disebabkan mereka tidak ada kekuatan atau mereka terjajah maka kewajipan menyampaikan atau memperjuangkan tujuan itu tidak akan gugur.

Untuk menegakkan hukum-hukum Tuhan yang meliputi di dalam cara bahagian hidup itu dengan sendirinya tidak dapat dilakukan daripada diperjuangkan sedang memperjuangkannya adalah menjadi suatu jihad yang wajib dilaksanakan oleh tiap-tiap pemeluknya kerana agama Islam itu, sebagaimana corak asas hukumnya di atas, tidak akan dapat dipisahkan daripada siasah negara, hanya sanya di dalam tempat-tempat

yang sedikit umatnya, kewajipan pemeluknya ringan sedikit tetapi mereka diwajibkan Tuhan, bukan diwajibkan oleh keadaan untuk menegakkan kalimah Tuhan (ertinya hukum-hukum Tuhan) dengan jalan terlebih dahulu memberi kesedaran. Cara memperjuangkan ini terang ditunjukkan oleh Nabī Muhammad (S.A.W.) sendiri.

Dengan ini ertinya maka timbulah kewajipan bagi tiap-tiap umat Islam untuk menegakkan negara Islam atau *Dār al-Islām* yang dalamnya telah terbentuk pula hukum-hukum di atas orang-orang yang bukan Islam yang duduk di dalam negara Islam. Kalau orang-orang mempelajari sejarah Nabī sehingga kepada sejarah Khulafā’ al-Rāshīdīn terang dan jelas bahawa di sana zahir dengan seterang-seterangnya bahawa agama Islam tidak dapat dipisahkan sama sekali dengan siasah dan kerana itu salah benar orang-orang menyangka apalagi mengugut-ugut untuk menahan perkembangan Islam itu bercampur dengan siasah. Perbuatan ini ertinya menahan umat Islam daripada menyempurnakan jihadnya pada jalan Tuhan.

### Pelajaran di Persekutuan

Tuan al-Sayyid Nasir bin Ismail, Pengarah Dewan Bahasa dan Pustaka, dalam ucapannya menyambut *Mawlid Nabawī Sharīf* di bawah anjuran Kesatuan Pelajar-pelajar Melayu Selangor di antara lain telah menyeru supaya pelajar-pelajar Melayu mengisi dadanya dengan ilmu pelajaran agama Islam yang maha suci.

Walau bagaimana tingginya pun pelajarannya kalau tidak disertai dengan ilmu pelajaran agama Islam yang maha suci maka pelajaran yang tinggi itu tidak akan berguna, kerana ilmu pengetahuan agama Islam adalah pembimbing manusia ke jalan kebahagian dan keselamatan- kata beliau.

Apa yang dikatakan beliau ini sungguhnya benar! Seseorang yang dadanya tidak berisi dengan pelajaran agama Islam maka mudah benar orang-orang itu kelak akan melakukan sesuatu yang kurang baik bahkan mereka akan terjauh dari masyarakatnya sendiri yang umumnya berpelajaran agama.

Kata-kata beliau ini sebenarnya mustahak benar diperhatikan oleh kerajaan Persekutuan Tanah Melayu dan oleh jabatan beliau sendiri. Kalau diperhatikan bahawa di dalam maktab-maktab